

■ COLUMNA

Impuls èn dapertut

DA MARIA CADRUVI

L'onn 1993 ha il Radio Rumantsch introducì la rubrica «Impuls» en ses program da la damaun. Questa rubrica datti anc oz. Mintga di dat ina persona in impuls cun in curt text da gnanc duas minutas. Rita Uffer ha tgirà ils Impuls davent da l'entschatta enfin oz e quai cun grond engaschi e cun ina tenuta bainvulenta e motivanta – ma era cun in spiert critic e sever. En tut quests onns ha ella registrà passa 6800 Impuls da zunt differents auturas ed auturs ed ella vegn ad avair pensà bleras giadas en connex cun tut questas registraziuns: impuls èn propi dapertut.

Na dar nagin impuls è impossibel. In di è Eva vegnida sin visita tar nus cun ses figl da 20 mais, cun Ivo. Cura ch'ella ha ditg adia aveva ella Ivo sin bratsch. Ed en quel moment vesa Ivo sin ina da nossas curunas, sin l'atezza da ses eglis, ina vasa da vaider, ina finezza, tschintg centimeters auta. La vasa era vida e pitschna avunda per la detta da l'uffant. Ed el tschiffa la vasetta. Mamma mia, hai jau patratgà, en duas secundas datti questa vasa, in souvenir d'in viadi en l'exteriur, mo anc en furma da staglias.



Eva realisescha immediat la situaziun. E di en tutta ruassaivladad a ses figl: «Fa fin e bufatg, mo bufatg.» Ivo mira sin la vasa tranter sia detta, mira sin sia mamma che repeta quietamain il bufatg bufatg e dat lura, suenter ina pitschna urella che ma para ina perpetnada, la vasa fragila ed anc adina entira a sia mamma. Senza vulair m'ha Eva dà in impuls. Cun sia reacziun, per mai nunspetgada, è ella stada per mai in exempel ch'ins sa era reagir auter. Cura che ses figl aveva tschiffa la vasa avess jau numnadamein ditg il pli gugent svelt e dad aut – e fitg impulsiv: «Na, lascha star. Quai na dastgas ti betg tschiffar!»

Ils blers impuls vegnan en noss mintgadi senza l'etichetta «Impuls». Els vegnan sco idea, inspiraziun, irritaziun, motivaziun. Per-

fin sin tualetta datti impuls. Il «secret», sco quai che quest lieu vegniva numnà pli baud, è tar nus a chasa ina spezia da deposit temporar per scrittiram che va suenter tar il palpigi vegl. «Die Welt braucht Blumen», era il titel sin in pitschen chalender da reclama. Ils bouquets da mintga mais eran uschè bels che jau hai stuì salvar il chalender anc in tempet. Ed ils citats sper las fluras ma parevan gnanca uschè tups, per exempel in da Marcel Proust: «Lain esser engraziaivels a las personas che dattan ventira a nus. Ellas èn ils ortulans amiaivels che fan che nosas olmas flureschan.» Per mai in impuls da ponderar la saira: Tgi è stà oz en mia vita in da quests ortulans amiaivels – e pertge? I dat ortulans da tuttas sorts. Da quels nunenconuschents che ma regalan simplamain in surrir sin via. Da quels che taschan cura che jau sun puspè insaquantas minutas memia tard. Da quels che san che la buna comunicaziun sa cumpogna era da tadlar e betg mo da discurren. Ortulans che fan che nossas olmas flureschan èn dapertut – sco quai che er impuls èn dapertut – betg mo la primavera.